

尚書集注述疏

尚書集注述疏卷二十二

周書

君奭

奭始亦反

蔡氏曰。召公告老而去。周公留之。史氏錄其言。亦誥體也。以周公首呼君奭。因以名篇。○謹案序曰。召公爲保。周公爲師。相成王爲左右。召公不說。周公作君奭。今以序攷之。於經皆無以見其爲不說者也。史記曰。成王旣幼。周公攝政。當國踐阼。召公疑之。蔡氏謂其爲序所誤。是也。蓋於攝政時言其不說也。列子曰。周公攝天子之政。召公不說。彼好事者爲之。久矣。而鄭氏釋序者。又異焉。謂周公旣攝王

政不宜復列於臣職。故不說。蓋於反政時言之也。凡鄭釋書。皆以爲周公居王位而攝政。故也。不愈誣哉。程子謂不說者。召公不敢自安也。周公作書勉之。然不自安者。而謂之不說。則序之爲文。豈其善邪。經稱周公謂君奭曰。在家不知。在家者。退老也。此周公留召公在國以知事。其見於經者。固明也。序豈有見乎。以篇次言之。君奭次無逸而在多士之後。則非攝政時矣。其反政時與。惟書之次。或非其次也。然其時雖異。而其義之得失則同。以爲周公留召公。則大臣之義也。以爲周公自留。故賊莽得而託之矣。音悅好去聲與平聲

進曰。釋文引馬云。今陝爲二伯。東爲左。西爲右。蓋釋序也。

樂記言武云。五成而分周公左。召公右。隱五年公羊傳云。天子三公者何。天子之相也。天子之相則何以三。自陝而東者。周公主之。自陝而西者。召公主之。一相處乎內。此馬之所据也。或曰。周公其以冢宰兼內相者歟。鄭說見書疏。又史記集解引馬說者。蓋與鄭同。漢書孫寶傳云。周公上聖。召公大賢。尚猶有不相說。著於經典。兩不相損。此從序而爲之說爾。失召公不說。序者云然。適以爲經之所著乎。是未察序非孔子作也。詳書序辨。漢書王莽傳言羣臣奏云。周公服天子之冕。南面而朝羣臣。發號施令。常稱王命。召公賢人。不知聖人之意。故不說也。又云。不居攝。則恐墜失天命。遂說之以書曰。在家不知。蓋以經言在家爲不居。

攝也。此莽臣之託於序者也。

周公若曰。君奭。弗弔。天降喪于殷。殷既墜厥命。我有周既受。我不敢知曰。厥基永孚于休。若天棐忱。我亦不敢知曰。其終出于不祥。嗚呼。君已曰。時我。我亦不敢寧于上帝命。弗永遠念天威。越我民罔尤違。惟人。在我後。嗣子孫。大弗克恭上下。遇佚前人光。在家不知。喪去聲佚音逸

蔡氏曰。君者尊之之辭。奭召公名也。古人尚質。相與語多名之是也。弗弔者。天不恤之也。喪者。喪亡也。墜者。墜失也。我不敢者。周公自我也。孚。信也。若。轉語辭。棐。輔忱。誠也。康誥曰。天威棐忱。言天輔人之誠也。嗚呼者。永歎之辭。時是也。是我者。言君奭自謂也。永遠。長久也。天威者。天命之可

畏也。越及也。皋陶謨曰。天明威。自我民明威。故言天威及我民也。尤過也。人謂以人臣佐人君也。無過違乎天威及我民。必惟其人而能之也。在我者。承上文我有周而言。後嗣子孫。謂成王也。恭上下者。蔡氏謂敬天敬民是也。卽所謂罔尤違也。佚失也。前人謂文武也。周公告召公。言天之降命。自殷而周矣。我不敢知而決曰。其基長信于受命之休。安知其必得天之命乎。若天惟輔人之誠。我亦不敢知而決曰。其終出于弗弔之不祥。安知其不得人之誠乎。嗚呼。君已自任其人曰。是我也。我亦不敢安于上帝命。弗長久念天威及我民無過違者。蓋念惟其人焉。如在我有周後嗣子孫。大不能敬上天下民。而過失前人受命之光者。

苟人臣在家則不知之矣。明當在國而知之也。此周公以召公欲退老在家而憂乎在國無人致其所以留之之意也。其言天命而曰惟人者一篇之大要也。永歎之永亦如字

述曰。林氏云。尊之爲君如棄謂之后稷也。史記燕世家云。召公奭與周同姓姬氏。白虎通云。召公。文王子。繇今攷之。僖二十四年左傳言文王之子者凡十六國。不言燕也。莊十三年穀梁傳云。燕周之分子也。蓋禮大傳所謂別子爲祖者歟。論衡云。召公。周公之兄。非也。君奭稱名。非弟所以稱兄也。弗弔。詳大誥篇。墜失。詳召誥疏。孚信。釋詁文。釋言云。若順也。僞傳以言此經於義未融也。斐忱。詳康誥疏。嗚呼者。書之通言也。漢石經殘文。於般庚。毋劬作於戲。漢書

擬大誥作烏虬。皆音同而假借焉。說文云。於古文烏。又云。孔子曰。烏。吁呼也。取其助氣。故以爲烏呼。其義也。詩抑云。於乎小子。詩釋文云。於音烏。乎音呼。蓋以其異文爲音也。詩清廟毛傳云。於歎辭也。然則嗚呼者。永歎之辭也。僞傳云。歎而言曰。君也。當是我之留。此從序而失之也。李氏光地云。已止也。君已者。呼召公而止之也。如其說。上下經文。義不貫也。君已者。對我亦而言也。釋詁云。永。長也。中庸云。悠遠。又云。悠久。則遠者。人也。越及。詳微子疏。論語包注云。尤。過也。尤。與訖通。詩綠衣云。我思古人。俾無訖兮。蓋念其無尤也。論語云。無違。桓二年左傳云。君違。不忘諫之以德。不忘者。念其無違也。我亦不敢寧于上帝命。弗永遠念天。

威越我民罔尤違。以一句讀也。其曰上帝命者。可微讀之。爾蓋以不敢之文貫之而下也。下文云。予惟用閔于天越民。卽以此之長句而約之也。朱子云。諸誥多長句。而朱子讀此經曰。弗永遠念天威越我民罔尤違。猶未竟其長也。經曰。惟人。蓋二字句也。從蔡讀焉。史之爲文。以短句爲長句之駐也。僞傳釋越爲於。而從上帝命。從天威。皆絕句焉。又釋在爲存。讀曰。惟人在我後嗣子孫。皆失之矣。或曰。漢書王莽傳。引此經云。我嗣事子孫。繇是推之。則漢讀曰惟人在。今不從者。以讀之未宜。非其辭氣然也。多士云。在今後嗣王立政云。其在受德啓。此在之爲文。其例也。後嗣作嗣事。此今文也。佚失。詳盤庚疏。蔡傳云。可得謂在家而不

知乎。蔡以不知爲活辭。蓋不知知也。猶下文不允不惠之例也。今不從者。以未顯乎留召公之意也。僞傳云。我老在家。則不得知。傳以爲周公自留也。嗚呼。君已曰而下。蔡傳從而分節焉。則時我之文。爲不屬矣。

大命不易。天難諶。乃其陞命。弗克經歷。嗣前人恭明德。在今小子且。非克有正。迪惟前人光施于我冲子。易以智反。施以豉反。

天命不易。蔡氏說以詩曰。命不易哉。諶。信也。諶。與忱通。詩曰。天難忱斯。不易維王。經歷重文。猶永遠也。弗克經歷者。爲成王冲幼言之。謂少不更事也。恭。卽上文恭上下之恭。謂恭上下之明德也。蔡氏謂命不易保。天難諶信。乃其陞失天命者。以不能經歷繼前人之恭明德也。在今者。對在

昔隆命而言且周公名也。言予小子。又言非克有正者。吳氏謂皆謙辭也。迪道也。謂導而行之也。下文多言迪者。自此發焉。前人光顧上文而言。施移也。我沖子。謂成王也。言在今我小子且。非能於我沖子有所正也。其迪導我沖子者。惟前人光移于我沖子者焉。蓋迪導而使之經歷。嗣前人也。重更俱平聲

述曰。引詩者。敬之及大明文。謹信。釋詁文。禮文王世子注云。三老五更。皆年老更事者也。今少者異焉。釋詁云。迪道也。詳皋陶謨疏。迪。惟前人光施于我沖子。以一句讀也。迪之一言。則微讀焉。洛誥云。迪將其後。其讀同也。詩葛覃毛傳云。施。移也。詩皇矣云。施于孫子。鄭箋云。施。延也。蓋移之

者延之也。經下文所以言德延也。漢書王莽傳引書曰。命不易。天應棗謖。乃亡隊命。蓋命不易上。無天字。天難謖作天應棗謖。其墜作亡隊。皆異文也。

又曰。天不可信。我道惟寧王德延。天不庸釋于文王受命。

又曰者。承上文公曰之辭。重提而告之也。寧王。武王也。猶大誥所稱也。於德不言文王者。武王之德。本乎文王之德也。釋舍也。於受命不言武王者。文王受命。開乎武王受命也。周公又言天命不可信。我之道惟以武王之德延長之。則天不用舍于文王受命矣。是天不可信而可信以人者也。此結上文天命惟人之意。○謹案篇中書又曰者再。何史文之善敘邪。呂氏曰。史敘其語之既終復續。并其神而

寫之者也。

重如字
舍上聲

述曰。書疏引鄭云。又曰。人又云也。鄭以爲周公稱人之言也。然經何以不言人曰乎。釋文引馬本。我道作我迪。蓋異文也。此承上文所謂迪者而言也。其對天言之。則不如言我道矣。我道者。自天道而決於人道也。於文尤洽也。寧王詳大誥篇。書疏引鄭云。寧王者。文王也。非也。晉語韋注云。釋舍也。釋詁云。延長也。書疏引王云。重言天不可信。明己之留。蓋畏其天命。此從序而爲之說爾。

公曰。君奭。我聞在昔。成湯既受命。時則有若伊尹。格于皇天。在大甲。時則有若保衡。在大戊。時則有若伊陟。臣扈。格于上帝。巫咸。又王家。在祖乙。時則有若巫賢。在武丁。時則有若甘盤。

大音
太愿

自此而下四節。告召公以殷惟其人而不墜命也。伊尹。湯之臣也。大甲。湯適孫。大宗也。保衡。伊尹之官。詩商頌謂之阿衡也。鄭氏曰。伊尹。湯以爲阿衡。阿。倚。衡。平也。伊尹。湯所倚而取平。至大甲改曰保衡。保安也。言天下所取安平。此皆三公之官。當時爲之號。是也。於湯時稱伊尹。於大甲時稱其官。互相備也。大戊。中宗也。伊陟。鄭氏謂伊尹之子也。臣扈。蔡氏謂與湯時臣扈。二人而同名也。巫。氏。咸名。蓋巫者。先世官族之氏也。祖乙。大戊之孫也。巫賢。或曰。巫咸之子也。武丁。高宗也。言甘盤。不言傳說者。周公言其時有若斯人。非必備舉之也。猶下文於周不言大公望也。格。至也。

言感而至之也。言皇天。又言上帝者。備其稱也。程子曰。以形體謂之天。以主宰謂之帝。是也。召誥曰。皇天上帝。多士曰。旻天。而再言之曰。上帝。其爲文同也。又相也。言治其事而相之也。相王家。則格于皇天上帝矣。其有所格者。必其有所相也。皆互文也。巫賢之下。不繫辭者。蒙上省文也。下文於此六人。皆言其保乂有殷。而明乎天壽平格也。○蘇氏曰。殷有聖賢之君七。此獨言其五。下文云。殷禮陟配天。豈配祀天者。祇此五王乎。適音嫡說音悅大音太相去聲述曰。詩蕩疏引鄭云。伊尹名摯。湯以爲阿衡。以尹天下。故曰伊尹。鄭之釋尹。非也。呂氏春秋云。有佚氏女子得嬰兒。其母居伊水之上。故命之曰伊尹。蓋古說也。是雖不足据。

乎。然孟子云。伊尹耕於有莘之野。則在野以尹名矣。豈以尹天下之故乎。猶曰。孟子或追稱爾。禮緇衣引尹吉者。則云。惟尹躬。是尹自稱名也。孫子稱伊摯。蓋摯非其本名也。其傳聞之異歟。史記云。伊尹名阿衡。誣也。佻與莘通。史記云。大甲成湯適長孫也。蓋大丁之子。大丁未立而卒也。詩長發云。實維阿衡。實左右商王。毛傳云。阿衡。伊尹也。蓋言湯時也。鄭保衡義。見書疏詩蕩疏蔡傳云。大戊。大甲之孫。今攷史記殷本紀云。大甲崩。子沃丁立。崩。弟大庚立。崩。子小甲立。崩。弟雍已立。崩。弟太戊立。此大戊爲大甲之孫也。釋文引馬云。大戊。大甲子。馬據史記三代世表言之也。世表以大戊爲沃丁弟。則亦大甲子也。蓋史遷兩存焉。鄭伊

陟義見詩蕩疏。江氏云。鄭蓋据世本而知也。今世本亡矣。書序云。伊陟相大戊。毫有祥。桑穀共生于朝。伊陟贊于巫咸。作咸乂四篇。此雖篇亡。而伊陟之忠可知也。書序云。湯既勝夏。欲遷其社。不可。作夏社。疑至。臣扈。蓋疑至。臣扈者。以二臣名篇也。則湯時有臣扈矣。夫以殷本紀攷之。湯至大戊。凡九君。而三代世表不詳其年。烏知其間諸王。不有千年者。湯之臣扈。豈必不以大年遷事大戊邪。今必以爲二人。何也。蓋使臣扈一人。而光輔九君也。則周公必特言之。史必特書之矣。一人分書。不有伊尹保衡之例在乎。今旣不然。陳氏經謂若詩與春秋家父同名是也。隱八年左傳云。官有世功。則有官族。蓋命氏爲之先也。咸乂序釋文。

引馬云。巫咸名咸。殷之巫也。馬之釋巫。非也。周官有司巫之職。卑官而已。禮表記云。殷人尊神。豈言其以巫相乎。楚辭云。巫咸將夕降兮。此設辭云爾。史記云。中宗崩。子仲丁立。崩。弟外壬立。崩。弟河亶甲立。崩。子祖乙立。此祖乙爲大戊之孫也。僞傳云。巫賢咸子。書疏謂相傳云然也。史記云。大甲稱大宗。大戊稱中宗。武丁爲高宗。言廟號也。甘盤史記作甘般。漢書古今人表。甘盤與傳說並書。皆武丁之臣也。孟子云。傳說舉於版築之間。史記云。武丁夜夢得聖人。名曰說。於是使百工求之。得說於傅險中。舉以爲相。殷國大治。則說固殷之賢也。或以爲說非舊臣。故周公不言之。非也。伊尹在湯時。亦非舊臣。何以於湯時言之乎。江氏云。

釋詁。說般義同。豈般之言說歟。蓋疑其爲一人而欲求經之備也。格主。釋詁文。史記集解引馬云。道至于上帝。謂奉天時也。馬言道者。於文未洽也。史記集解引鄭云。皇天。北極大帝也。上帝。大微中其所統也。太。與太通。下大皞同。今攷禮月令云。皇天上帝。鄭注云。皇天。北辰耀魄寶。冬至所祭於圓丘也。上帝。大微五帝。蓋與此說同。皆据春秋緯文也。淮南子云。大微者。大一之庭也。月令疏云。大微爲天庭。中有五帝座。其說也。故鄭以五帝統焉。何其以緯亂經也。周官司服云。王之吉服。祀昊天上帝。則服大裘而冕。祀五帝亦如之。昊天上帝者。尊稱之備也。猶皇天上帝也。五帝者。五人帝也。禮郊特牲疏云。賈逵。馬融。王肅以五帝非天。

謂五人帝是也。今以月令言之。孟春之月。其帝大皞。其神句芒。是月也。以立春。盛德在木。天子迎春於東郊。孟夏之月。其帝炎帝。其神祝融。是月也。以立夏。盛德在火。天子迎夏於南郊。中央土。其帝黃帝。其神后土。蓋分王乎四時者也。孟秋之月。其帝少皞。其神蓐收。是月也。以立秋。盛德在金。天子迎秋於西郊。孟冬之月。其帝顓頊。其神元冥。是月也。以立冬。盛德在水。天子迎冬於北郊。此天子迎四時之氣也。則必祀天帝於四郊矣。祀天帝而以人帝配其食也。則必祀五帝若大皞者矣。周官小宗伯云。兆五帝于四郊。其義也。四郊之兆。以天帝言之。則一而已矣。無以別也。故以所配五人帝別焉。其服大裘而冕者。則冬而合祀五人

帝也。大裘者。冬服也。其服與祀昊天上帝同者。以五人帝行天之四時。而本配祀於天帝故也。月令於孟冬云。天子祈來年於天宗。而言季冬。畢祀者。則云。帝之大臣。天之神祇。此五人帝與昊天上帝並言者也。司服之五帝。當爲五人帝。其例也。鄭月令注云。四時之功成於冬。孟月祭其宗。至此可以祭其佐也。帝之大臣。句芒之屬是也。而鄭小宗伯注云。五帝。蒼曰靈威仰。大昊食焉。赤曰赤熛怒。炎帝食焉。黃曰含樞紐。黃帝食焉。白曰白招拒。少昊食焉。黑曰汁光紀。顓頊食焉。黃帝亦於南郊。昊與皞通。蓋鄭以五帝爲天帝也。亦据春秋緯文也。絲鄭言之。則昊天上帝之與五帝也。將六天而六帝乎。孔子曰。天無二日。民無二王。其義

安在乎。申鄭者。謂五帝合之。則一帝也。然既曰五帝。豈禮所謂決嫌疑者而有此乎。宜王肅聖證論之難鄭也。不可以人廢言也。宜程子以鄭學之徒爲大惑也。禮疏必從鄭者。疏例無駁。不知事師無犯無隱之義也。唐長孫無忌則奏言鄭失矣。馬氏端臨云。程子謂以形體謂之天。以主宰謂之帝。如此則曰帝可矣。何必列於五。且於祀上帝之外。別祀五帝乎。蓋五帝爲五行之主而在天。猶五岳爲五行之鎮而在地。五帝不出天之外。而謂五帝卽天。不可。五岳不出地之外。而謂五岳卽地。不可。蓋以五帝爲天之五行之主也。此異乎鄭之稱緯爲名者也。然禮之稱五人帝者。非以五行故。而列於五邪。夫地言五岳可也。天言五帝可。

乎。戰國之末。爭東帝西帝矣。漢文帝與趙佗書。責兩帝竝立矣。天人之理。一也。朱子曰。今郊祀。增成十帝。一國三公。尙不可。况天而有十帝乎。朱子所謂十帝者。自天之五帝。爲之漸也。天言五帝。可乎。其不可也。易說卦云。帝出乎震。齊乎巽。相見乎離。致役乎坤。說言乎兌。戰乎乾。勞乎坎。成言乎艮。又云。兌。正秋也。坎者水也。則天之四時五行。可知也。則帝之主宰乎天者。可知也。而易惟稱帝焉。豈稱五帝哉。此易之爲稱。蓋通乎春秋特尊天王者也。楊氏復云。以五人帝爲五帝。則五人帝之前。其無司四時者乎。非也。夫司四時者。易說卦所謂帝也。自大極分兩儀而已然也。其帝則一也。易所以言享上帝也。五帝則配享之人帝也。非

天帝也。非一而五之也。或曰。漢書魏相傳云。東方之神大
昊。乘震執規司春。南方之神炎帝。乘離執衡司夏。西方之
神少昊。乘兌執矩司秋。北方之神顓頊。乘坎執權司冬。中
央之神黃帝。乘坤艮執繩司土。蓋以月令大昊五者爲天
之五帝之名也。此變乎鄭之稱緯爲名者也。然天之五帝
之嫌。其實不與鄭同乎。且魏相之說。謂五人帝之神。非謂
天帝也。故其說云。東方之卦。不可以治西方。南方之卦。不
可以治北方。明王謹于尊天。慎于養人。故立羲和之官。以
乘四時。節授民事。蓋明王濬五人帝之乘四時也。昭二十
九年左傳云。木正曰句芒。火正曰祝融。金正曰蓐收。水正
曰元冥。土正曰后土。少皞氏有四叔。曰重。曰該。曰修。曰熙。

實能金木及水使重爲句芒。諒爲蓐收。修及熙爲元冥。顓
頊氏有子。曰犁。爲祝融。共工氏有子。曰句龍。爲后土。此言
五行之官也。月令所謂帝之大臣也。以此明大昊五者皆
人帝也。僞家語稱康子問五帝。孔子言昔聞諸老聃曰。天
有五行。以成萬物。其神謂之五帝。故其生爲明王者而死
配五行。康子乃引傳言五正者而問之。則曰。此五行之主
而不亂。稱曰帝者何也。孔子曰。凡五正者五行之官。名五
行。佐成上帝而稱五帝。大皞之屬配焉。謂配上帝也。其下
文云。唐虞夏殷周。不得配五帝。謂無配爲五人帝也。此禮
郊特牲疏謂家語主肅私定者也。蓋借以難鄭云爾。家語
所謂其神者。自人言之也。所謂五行之主者。亦自人言之。

也。馬氏及或說據之。皆反失其本意者也。然則周官大司
寇。何以言禋祀五帝乎。蓋禋者祀神之通稱。非必祀天也。
周語云。精意以享。禋也。分王之王。讀去聲。禮記釋文云。句
古侯反。周官釋文云。燔必消反。汁音叶。蓋汁之義。亦叶也。
又相。詳多方疏。史記云。巫咸治王家。蓋治者。又之訓也。然
非兼相之義而言。是臣治王家也。非相治矣。豈立言之善
乎。蔡傳引呂氏之說。以爲伊尹於湯。以聖輔聖。伊陟臣扈
於大戊。以賢輔賢。其治化所格。或天或帝對言之。則聖賢
之分。而淺深見矣。巫咸祇言其又王家。次於二臣也。巫賢
甘盤而無指言者。又次於巫咸也。此不察其互文而失之
也。

率惟茲有陳。保乂有殷。故殷禮陟配天。多歷年所。

率皆也。惟語辭。茲此也。蓋蒙上文所謂有若者而言也。言惟有若此六人。蓋隨舉之辭。猶下文於武王言惟茲四人也。陳謂以道陳告於君。卽上下文所謂迪者之事也。若孟子言陳善。詩序言陳王業。所謂有陳也。保安。乂治也。陟者。蔡氏以爲升遐是也。顧命曰。惟新陟王。配天者。配祀天也。孝經曰。郊祀后稷以配天。宗祀文王於明堂以配上帝。而統之曰。嚴父莫大於配天。此周禮也。殷禮蓋五王皆配天焉。此承上文而言。蓋殷五王皆惟有若此六人有所陳告。遂安治有殷。故殷禮於其升遐以配祀天。其享國多歷年所也。左傳曰。商載祀六百。

還音
環

述曰。率皆詳湯誓疏。惟語辭於經多矣。今必釋之者。明乎
惟不訓獨也。殷賢臣非獨此六人也。詩序云。七月。陳王業
也。論語稱周任之言云。陳力就列。言相道也。史記集解引
王云。循此數臣有陳列之功。安治有殷也。僞傳略同。此於
文未洽也。曲禮云。告喪曰。天王登假。釋文云。假音遐。蓋古
通也。釋詁云。假陟登升也。朱氏彬云。配天者。受命爲天子
也。非必如孝經后稷配天之謂也。詩文王云。殷之未喪師。
克配上帝。洛誥云。其自時配皇天。越祀于上下。中庸云。凡
有血氣者。莫不尊親。故曰配天。皆其義也。故多士云。殷王
亦罔敢失帝。罔不配天其澤。蓋統自成湯至于帝乙而言
也。繇朱氏言之。以言殷王配天可也。以言殷禮陟配天不

可也。夫禮行於陟王而配祀天者。則殷之特禮也。若五王
宜也。論語云。周因於殷禮。所損益可知也。配天者。殷禮之
大。周其因而損益歟。或曰。禮祭禘云。殷人禘嘗而郊。冥。周
人禘嘗而郊。稷。然則配天者。郊。冥也。郊。冥。猶郊。稷也。禮無
與於殷之五王也。非也。今欲辨郊。先與辨禘。則郊可知矣。
詩商頌序云。長發。大禘也。其詩云。有娥方將。帝立子生商。
詩之歌大禘也。何以言有娥而不言嘗乎。頌其母而忘其
父。詩人不若斯之悖也。詩元鳥云。天命元鳥。降而生商。蓋
商契者。有娥吞鳥卵而生也。使有娥爲嘗之妃。而曰元鳥
生商也。何其悖哉。易繫辭傳云。天地絪縕。萬物化醇。此元
鳥所以生商也。詩周頌序云。思文。后稷配天也。夫后稷棄

也。生而棄之。故以名焉。詩生民云。厥初生民。時維姜嫄。又云。履帝武敏歆。遂云。居然生子。釋訓云。武。迹也。敏。拇也。蓋周棄者。履帝武敏而生也。詩亦言姜嫄而不言譽也。詩斯干云。似續妣祖。妣。姜嫄也。祖。后稷也。易所以言過其祖。過其妣也。周官大司樂所以享先妣。在享先祖之上也。皆不言譽也。今祭禴之言。皆曰禴。譽。其未可執者。若斯矣。其言郊冥。則亦未可執也。安見殷五王不與於郊也。禮之祭禴。采乎國語者也。豈如尙書之足徵邪。禮運云。宋之郊也。契也。則言郊冥者。非也。禮運疏謂後王改之者。亦執祭禴而爲之說爾。且祭禴云。冥勤其官而水死。注云。冥。契六世之孫也。其官。元冥。水官也。故卽以祭禴言之。周人郊稷。殷人

宜郊契。今郊冥與郊稷不同。是冥以有功而郊也。則殷五王皆有功矣。陟而配天。其斯爲殷禮之與於郊者乎。詩周頌序云。我將祀文王於明堂也。此孝經所謂配上帝也。猶后稷配天也。故孝經以配天而統之也。則周之配天。實亦不惟后稷焉。其何疑於殷五王哉。引左傳者。宣三年文。

天惟純佑命。則商實百姓。王人罔不秉德明恤。小臣屏侯甸。矧咸奔走。惟茲惟德稱。用乂厥辟。故一人有事于四方。若卜筮。罔不是孚。屏實領反。辟必益反。

純。大佑助也。商實者。蔡氏謂國有人則實也。孟子曰。不信仁賢。則國空虛。是也。又商實者。其爲文猶左傳言鄭昭宋聾也。謂商之實德也。詩曰。實維阿衡。實左右商王。百姓百

官也。王人猶春秋所謂王人也。蔡氏謂王臣之微者也。小臣蒙上文百官而言。屏藩屏也。侯甸外服之近者。對下文四方而言。矧况威同也。奔走者大臣也。蒙上文百官而言。詩曰。予曰有疏附。予曰有先後。予曰有奔走。予曰有禦侮。此四行大臣。獨稱奔走者。以其職在喻德宣譽。使天下人奔走有事于四方者也。內外大臣爲奔走者非一人。故謂同奔走焉。明大臣尤執德而藩屏商也。惟茲與上文惟茲同。謂殷六人也。稱舉又相辟君也。小筮者著龜之信也。言天惟大助命商者。則以商得賢人之實也。自內而百官之微如王人。無不執德以明憂。外而百官之小臣。猶藩屏侯甸。況內外大臣同奔走者乎。惟此殷六人。惟百官之德是

舉用以相其君。故天子一人有事于天下四方。如卜筮然。無不以是德信之也。蓋相臣之道。莫大於以人事君。此故特言殷六人舉德而格天者也。下文所以告召公。明我俊民也。左先後行皆去聲

述曰。純大釋詁文。佑與右通。釋詁。右助義同。鄭昭宋龔。宣十四年左傳文。引實義者。詩長發文。蓋實有伊尹者。實左右以助商王。此商之德所繇實也。詩板云。不實於匱。又云。天之方難。毛傳云。匱誠也。蓋誠者實德之孚也。言周之不實。而天難之也。則此經可反觀矣。下文云。偶王在匱。蓋言實也。百姓詳堯典篇。酒誥云。越在外服。係甸男衛邦伯。越在內服。百僚庶尹。惟亞惟服。皆殷之百官也。書疏引王云。

王人。猶君人也。非也。春秋僖公八年。春。王正月。公會王人。
齊侯。宋公。衛侯。許男。曹伯。陳世子款。盟于洮。公羊傳云。王
人者何。微者也。曷爲序乎諸侯之上。先王命也。詩桑扈云。
萬邦之屏。昭九年左傳云。以蕃屏周。其義也。蕃。古通藩。詩
閟宮云。克咸厥功。鄭箋云。咸。同也。引奔走者。詩縣文。走。詩
作奏。詩釋文云。奏。亦作走。毛傳云。率下親上。曰疏附。相道
前後。曰先後。喻德宣譽。曰奔走。武臣折衝。曰禦侮。鄭箋云。
奔走。使人歸趨之。是也。大傳以此四行爲文王四臣。詩疏
云。傳因有四人爲之說爾。詩以此四行該羣臣。明非一臣
有一行也。詳下閟天疏。辟。君。釋詁文。僞傳云。天惟大佑助
其王命。使商家百姓豐實。自湯至武丁。其王人無不持德。

立業。明憂其小臣。使得其人。以爲蕃屏。侯甸之服。小臣且憂得人。則大臣可知。又云。王猶秉德憂臣。况臣下得不皆奔走。惟王此事。惟有德者舉。用治其君事。蓋傳從百姓從秉德。從惟茲。皆絕句焉。失之矣。其言王人者。與王說同。蔡傳云。內之百官著姓。與夫王臣之微者。無不秉持其德。明致其憂。外之小臣。與夫藩屏侯甸。矧皆奔走服役。惟此之故。惟德是舉。用乂其君。蔡言矧者。於文未適也。或曰。矧與攷通。說文云。攷。况也。詞也。詞與辭通。此爲語辭。不訓况也。非也。是烏知此辭卽爲况者之辭乎。不然。則矧爲何語之辭也。豈凡語皆用之乎。釋言云。矧。况也。不稱辭者。蓋繫之釋言。明乎其爲况者之辭也。今不辨其辭。何以求况者之

實邪。故六書小學。執之者非。輕之者亦非。易傳之文。善夫。公曰。君奭。天壽平格。保乂有殷。有殷嗣。天滅威。今汝永念。則有固命。厥亂。明我新造邦。

壽者。無逸所謂享國克壽也。卽上文之多歷年所也。呂氏曰。坦然無私之謂平。天無私壽。惟平格于天者。則壽之是也。嗣。繼也。威。猶皋陶謨否則威之之威。永念者。上文所謂永遠念天威也。造成也。言天壽惟平格焉。彼殷旣得人而安治有殷矣。有殷猶繼而天滅威之。此以見前王自天壽後王自天威。天壽所以常平。天命所以難固也。今汝永念天威。則天有固命。其治光明我新成之國。蓋所謂平格也。○謹案經上文言天命者。謂我不敢知曰。厥基永孚于休。

若天斐忱。我亦不敢知曰。其終出于不祥。以此知天命之平也。平格者。以人心之平。感乎天命之平。其亶然而平者。皆其亶然而誠者也。亶然猶坦然也。其平格也。自人言之。則下文所謂在亶也。自天言之。則上文所謂斐忱也。斐忱者。以天命之平。固乎天命之長。詩曰。天保定爾。亦孔之固。遂曰。萬壽無疆。言其能平格也。詩曰。赫赫師尹。不平謂何。遂曰。昊天不平。我王不寧。言師尹相王而不平也。則昊天所不平矣。天所平者必寧。天所不平者必不寧。詩曰。壽考且寧。烏有不寧而壽考者乎。繇是推之。此無逸所以傷殷後王之罔或克壽也。

亶音

述曰。書疏引鄭云。格。謂至于天也。專言臣事。鄭言殷六臣

也。然殷五王得六臣以保乂有殷者也。書疏引王義以爲兼言君臣是也。僞傳云天壽平至之君。故安治有殷。有殷嗣子紂。不能平至。天滅之以威。傳所謂故者。非也。經上文云。多歷年所。是天壽也。其壽之故。經言其保乂有殷。故也。今傳之言。適倒之矣。其釋嗣者。於文未適也。呂氏云。殷紂繼嗣天位。乃罹滅亡之威。於經病添文也。嗣。繼釋詁文。孟子云。繼而有師命。其例也。猶今人言嗣後也。造廣。詳下文疏。荀子。路賁。卽露袒。說文云。壇之言坦也。則亶然猶坦然也。詩常棣云。亶其然乎。蓋亶然行之。則平矣。亶然示之。則誠矣。故大學言平天下者。必先誠意焉。引萬壽考。詩天保文。引不平者。詩節南山文。鄭箋云。昊天乎。師尹爲政不平。

朱子云。尹氏之不平。若天使之。故曰昊天不平。此皆未叶
乎詩之本義也。襄十三年。吳乘楚喪而侵之。左傳云。君子
以吳爲不弔。詩曰。不弔昊天。亂靡有定。此詩節南山文也。
此猶昭二十六年左傳所謂天不弔周也。亦猶君奭言殷
者所謂弗弔也。詩釋文云。弔如字。又丁歷反。鄭箋云。弔至
也。至猶善也。又云。不善乎。昊天愬之也。今以左傳稽之。鄭
言不弔者。非也。則言愬不平者。亦非也。此不平與不弔。當
自天言之也。猶呂刑所謂上帝不蠲也。朱子言不弔者。與
左傳義同。然則昊天既不弔矣。豈使之不平者邪。引壽考
者。詩殷武文。

公曰。君奭在昔上帝割申勸寧王之德。其集大命于既躬。

自此而下四節。告召公以文武惟其人而不墜命也。在昔上帝割者。承上文有殷嗣天滅威而言也。多士曰。有命曰。割殷。告敕于帝。申重也。勸勉也。卽下文所謂迪者之事也。多方曰。不克終日。勸于帝之迪。然則勸者人勸之矣。此承上文惟人而言也。言重勸武王者。明旣勸文王之德而受命也。下文所以先自文王言之也。躬身也。言在昔上帝割殷。則帝命必有所集矣。惟其人重勉武王之德。其集大命于其身。此承上文天命惟人之意。而起下文有人而迪文武之端。

重平聲

述曰。在昔上帝割。從蔡讀焉。禮緇衣云。君奭曰。在昔上帝。周田觀文王之德。其集大命于厥躬。鄭禮注云。古文周田。

觀文王之德。爲割申勸。寧王之德。今博士讀爲厥亂勸。寧王之德。三者皆異。古文似近之。段氏云。今博士讀者。今文尙書也。此於讀字逗之。與他注某讀爲某者不同。鄭禮注云。割之言蓋也。言文王有誠信之德。天蓋申勸之。今攷釋言云。蓋割裂也。葦割義同。此鄭之所据也。今不從者。於文未適也。言天勸之。不言人勸之。上下經文。義不貫也。寧王者。下文稱曰武王。大誥所謂寧武也。非文王也。詩大雅云。文王以寧。非稱號也。商頌長發之詩。旣稱湯矣。又稱湯曰武王。此互稱之例也。如以寧王爲文王。則經何以言申勸哉。夏氏僕云。天勸文王。又勸武王。故曰申勸。此自武王言之。是矣。其言天勸者。亦非也。說文云。勸。勉也。躬身釋詁文。

惟文王尙克修和我有夏。亦惟有若虢叔。有若閼夭。有若散宜生。有若泰顛。有若南宮括。虢古百反閼音宏夭於驕反散素但反顛丁田反括古活反

尙庶幾也。有夏者。所有中夏也。論語所謂三分天下有其二。康誥所謂用肇造我區夏也。修和者。修而和之也。蔡氏以爲康誥所謂越我一二邦以修。無逸所謂用咸和萬民也。亦者。亦殷王也。虢。國名。叔。字。文王弟也。閼。散宜泰。南宮。皆氏也。夭。生顛括。皆名也。不言大公望者。呂氏謂一時詳略隨言。非爲人物評也。蔡氏曰。言文王庶幾能修和我有夏者。亦惟有虢叔等五人也。大音太

述曰。亦義詳無逸疏。僖五年左傳云。虢仲虢叔。王季之穆也。爲文王卿士。勳在王室。緜今攷之。漢志。右扶風虢縣。此

西虢也。虢叔封焉。今陝西鳳翔府寶雞縣也。漢志河南郡
滎陽縣應劭云。故虢國。此東虢也。虢仲封焉。今河南開封
府滎澤縣也。墨子云。文王舉閔夭。泰顛于且綱之中。授之
政。又云。周文王伐殷有國。泰顛來賓。此足徵也。僞傳云。散
氏。宜生名。蓋傳本之五經異義也。非也。大戴禮帝繫篇云。
堯取于散宜氏之女。謂之女皇。漢書古今人表云。女皇。堯
妃。散宜氏女。則散宜者。氏也。大傳云。西伯囚羗里。散宜生
閔夭。南宮括。三子者。相與學訟于大公。大公知三子賢。酌
酒切脯。除爲師學之禮。約爲朋友。遂與三子見文王于羗
里。蓋古說也。晉語云。文王敬友二虢。其卽位也。咨于二虢。
度于閔夭。謀于南宮。蓋南宮氏多才者也。若周書克殷篇

稱曰忽曰伯達者。皆可謀焉。而括當在其中矣。史記云。西伯曰文王。禮下賢者。太顛闕夭。散宜生。皆往歸之。崇侯虎譖西伯於紂。乃囚西伯於羑里。闕夭之徒患之。乃求美女文馬奇物。獻之紂。乃赦西伯。蓋太顛卽泰顛也。而大傳言囚事者。不盡與史記同。大傳云。文王以闕夭。大公望。南宮括。散宜生爲四友。文王四年。伐畎夷。紂乃囚之。五年。四友獻寶。乃得免於虎口。又云。孔子曰。文王有四臣。以免虎口。蓋四友卽四臣也。書疏詩縣疏引鄭云。詩傳說有疏附。先後奔走禦侮之人。而曰。文王有四臣。以受命。此之謂也。又鄭云。不及呂望者。大師也。周公謙不敢自比焉。此鄭從序而爲之說爾。詩大明云。維師尙父。時維鷹揚。毛傳云。師大

師也。鄭箋云。尙父。呂望也。尊稱焉。史記云。大公望。呂尙者。東海上人。西伯出獵。得之。曰。吾大公望子久矣。故號之曰。大公望。孫子云。周之興也。呂牙在殷。則未知牙之爲名歟。孟子云。若大公望。散宜生。則見而知之。蓋知道者也。鄭稱詩傳說者。其韓詩魯詩之說邪。蓋鄭先通韓魯而後箋毛詩也。

又曰。無能往來茲。迪彝教。文王蔑德降于國人。亦惟純佑秉德。迪知天威。乃惟時昭文王。迪見冒聞于上帝。惟時受有殷命哉。
蔑亡結反見音
現冒莫報反

往來者。言五人或往或來。常親之也。茲迪者。於此迪導文王也。迪彝教。卽迪德也。皋陶謨曰。允迪厥德。蔑無也。夏氏

謂周公又反言。若五人不能爲文王往來。於此導其常教。則文王無德降及於國人矣。亦惟者。轉語辭。蔡氏謂上既反言。此又正言也。曰秉德。曰天威。皆願上文而言。知天威者。知天威棐忱也。昭明也。卽所迪者之明也。見著也。言德之著也。冒者。如天之覆物也。中庸言至聖之德曰。見而民莫不敬。遂曰。凡有血氣者。莫不尊親。故曰配天。蓋見冒也。言亦惟五人大助以執德。導其知天威。乃惟是明乎文王。導其德著爲覆冒。遂聞而格于上帝。惟是我周受有殷之命哉。康誥曰。我西土惟時怙冒。聞于上帝。帝休。天乃大命文王。殪戎殷。此之謂也。○謹案經上文曰。天維純佑命。以天之大助言也。此曰。亦維純佑秉德。以人之大助言也。蓋

人大助之。故天大助之。互相明也。其言聞于上帝而受命者。卽所謂純佑命也。佑與祐通。易之大有曰。自天祐之。而繫辭傳則曰。祐者助也。天之所助者。順也。人之所助者。信也。非以人之所助。明天之所助乎。

能爲之爲去聲。覆浮去聲。

述曰。無能往來茲迪彝教。以一句讀也。蔑無。詩板毛傳義也。書疏引鄭云。蔑小也。周書祭公篇云。追學于文武之蔑。孔鼂注云。蔑微德也。蓋微猶小也。今不從者。於文未適也。夏氏者。僕也。宋史藝文志著錄焉。僞傳讀此經曰。亦惟純佑曰。秉德迪知天威。蔡傳同。皆承上文而言。以爲天亦惟純佑命也。不以爲五人純佑秉德也。如其說。則經不當云天亦惟純佑命乎。且方言天之純佑。何遽言秉德乎。於文

未適也。僞傳謂文王秉德。蔡傳謂秉德之臣。皆於經病添文也。詩既醉云。昭明有融。則昭者明也。易乾文言云。見龍在田。天下文明。蓋見者其德文明之著也。冒義詳康誥疏。釋文云。冒。馬作勛。勉也。今攷於經。作冒是也。下文云。丕冒。又云。海隅出日。罔不率俾。蓋明其爲覆冒之義也。乃惟時昭文王迪見冒。以一句讀也。

武王惟茲四人。尙迪有祿。後暨武王誕將天威。咸劉厥敵。惟茲四人。昭武王惟冒。丕單稱德。

上文五人。而此言四人者。蔡氏謂虢叔先死也。上文於文王言命。而此於武王言祿者。蔡氏謂文王始受命。武王富有天下也。將。奉。劉。殺也。單。盡也。猶洛誥於稱德者。言乃單。

文祖德也。言武王惟有若此四人。庶幾導其有天祿。其後與武王大奉天威。同般其敵。惟有若此四人。明乎武王。惟其德之覆冒焉。使武王大盡舉其覆冒之德也。蓋文王冒西土者。武王則冒天下矣。此下文所以言丕冒也。○謹案以十亂言之。今所及者。四人爾。有婦人焉。異乎君奭。其不及。宜也。詳略隨言。死生當異。其不及。亦宜也。若夫周公。今與召公言。昔皆迪武王者也。而今皆不及焉。何哉。蓋大臣之義。不言前功。且讓其功於同官也。其所自及者。則今當迪我沖子而已矣。

述曰。書疏引鄭云。至武王時。虢叔等有死者。餘四人也。鄭於死者不斥言也。今攷史記云。武王克商。散宜生。太顛。閎。

天。皆執劍以衛。又云。命南宮括散鹿臺之財。發鉅橋之粟。命閔天封比干之墓。又云。命南宮括展九鼎。皆不言虢叔也。周書克殷篇。與史記略同。其言散粟者。則南宮忽也。其言遷九鼎者。則南宮伯達也。而亦皆不言虢叔也。太與泰通。括與适通。墨子云。武王有閔天。泰顛。南宮适散宜生。蓋四人備見而虢叔闕焉。然則虢叔其先死矣。僞孔叢子云。虢叔死。四人者爲之服。此襲於古而爲之說爾。論語十亂。馬注亦不言虢叔也。將奉。詳洛誥疏。劉毅。釋詁文。惟茲四人昭武王惟冒。以一句讀也。冒。說文引作瞞。蓋古文之假借也。

今在予小子旦。若游大川。予往。暨汝夷其濟。小子同未。在位。誕

無我責。收罔勛不及。考造德不降。我則鳴鳥不聞。矧曰。其有能格。造才老反。又七報反。

自此而下至篇終。周公告召公。當二人勛王而不墜命也。今在者。對昔在殷及文武之臣而言。游謂浮行也。小子後生也。對下文考造德而言。周公於召公。自稱曰予小子。則稱曰小子者。謂後進諸後生也。洛誥言周公所稱多子者。小子在其中矣。酒誥言小子曰。有正有事。亦諸臣之小子也。召公以老成人去位。將至彼小子在老成人之位。德望未孚。不敢責難。與未在位同。周書芮良夫篇曰。惟爾執政小子。同先王之臣。其爲文同也。我者我王也。顧上文我冲子而言。責者責難也。孟子所謂責難於君也。收聚也。上文

既言文武之德矣。此言聚文武之德而收之也。詩言成王
頌文王之德曰。我其收之。蓋收文之德者。統乎收武之德
也。勛勉也。勉我王也。故下文以明勛者言偶王也。考老也。
造鄭氏謂成也。言召公爲老成人也。於德言降者。上文所
謂德降于國人也。不以王德不降爲言。而以考造德爲言
者。上文言無五人迪文王。則文王無德降。是王德繇老成
人之德也。老成人之德可降。自王降之。今無老成人勛王。
是老成人之德不降也。言鳴鳥者。召公之詩曰。鳳皇鳴矣。
當此時也。格者。上文所謂天壽平格也。言今在我小子旦。
若浮行大水。予所往者。與汝夷其共濟焉。苟彼小子在汝。
老成人之位。則同於未在位爾。蓋小子初在位。小有進言。

大無我王責難也。所聚文武之德而收之者。無勉王之不及矣。老成人之德不自王而降矣。我王則今鳴瑞鳥將不聞。况曰其有能平格乎。

述曰。詩板毛傳云。游行也。釋水云。順流而下曰遡游。蓋游者。浮行也。蔡傳云。小子。成王也。成王幼沖。雖已卽位。與未卽位同。僞傳云。成王同於未。在位卽政時。皆非也。立政稱成王曰孺子王。洛誥稱王。又稱孺子。今經曰我沖子。於偶王曰王。亦其義也。如周公自稱曰予小子。而稱成王亦曰小子。不嫌於等君乎。王以小子在位。而曰同。未。在位。不嫌於無君乎。或曰。誕語辭。故生民之詩言誕者凡八。皆語辭也。非釋詁誕大之義也。是不然也。誕蓋語辭之稱大者也。

今人言多曰大。亦猶然也。我義詳康誥疏。收聚。釋詁文。詩周頌云。維天之命。於穆不已。於乎不顯。文王之德之純。假以溢我。我其收之。駿惠我文王。曾孫篤之。毛傳云。假。嘉。收聚也。又云。成王能厚行之也。鄭箋云。純。亦不已也。溢。盈。溢之言也。以嘉美之道。饒衍與我。我其收斂之。大順文王之意。是也。蓋通詩於書。自成王言收者。其義皆符也。詩不及武王者。方祭文王故也。然武王丕承。則其德統於斯矣。僞傳云。欲收教無自勉。不及道者。書疏云。收教。王朝之臣。此於文未適也。文選郭有道碑云。收朋勤誨。豈謂此邪。呂氏云。召公若收斂退藏。無勉王之不逮。此於經病添文也。說文云。斂。收也。今轉注之。然謂召公收斂。不添文曰退藏。則

晦矣。江氏云。大毋責我收斂。此以爲周公自留而失之也。其讀又非也。經何不曰。誕無責我收乎。吳語韋注云。收還也。孫氏云。大無責我還國。其失與江氏同。考老釋詁文。釋言云。造。爲也。爲之。則有成矣。說文云。造。就也。就之。則遂成矣。或曰。訓詁之繇。凡若釋造者。何也。此文義之以一端而相生者也。故孳生則曰字焉。其以一端而相生者。猶易之序卦也。夫需者。豈悉飲食乎。而曰。需者。飲食之道也。飲食豈悉訟乎。而曰。飲食必有訟。蓋以一端言也。序卦類有然也。魏志注引鄭云。考老也。造。成也。詩曰。小子有造。老成德之人。不降志與我竝在位。鄭釋降者。非也。隱十一年左傳云。其能降以相從也。此言降不言德也。鄭舍德降而言降。

志於文未洽也。鄭引造義者。詩思齊文。今從鄭而節焉。嫌乎雜小子之文也。說文云。鳳。神鳥也。釋鳥郭注。以爲瑞應鳥焉。周語云。周之興也。鸞鷟鳴于岐山。蓋其物歟。引鳴義者。詩卷阿文。序云。卷阿。召康公戒成王也。

公曰。嗚呼。君肆其監于茲。我受命無疆。惟休亦大。惟艱。告君乃猷裕。我不以後人迷。監主聲

肆。今也。茲。謂上文所告者也。卽茲。詰也。艱。難也。上文所謂天命不易也。猷。謀也。裕。寬也。謂寬而不迫也。孟子曰。則吾進退。豈不綽綽然有餘裕哉。今召公告退而不迫焉。則裕矣。禮曰。大夫七十而致仕。召公以考造告退。禮也。周公留之者。裕也。此又禮所謂若不得謝者與。迷。惑也。詩曰。其在

于今興迷亂于政。言君今其監視于此告乎。我有周受命無窮惟美。亦大惟難。今告君乃謀告退之裕。我人臣不以有周後人迷惑矣。蓋卽上文言我後嗣子孫之意也。下文言明勛者卽不以後人迷也。緯音卓

述曰肆。今艱難。釋詁文。易釋文引蠱六四馬注云。裕寬也。互詳康誥疏。引禮者。曲禮文。蔡傳引呂氏云。召公遭破斧之時。心勞力瘁。非平時大臣之比。願以王未親政。不敢乞身爾。一旦政柄有歸。浩然去志。固人情之所必至。此以常情言召公也。非也。書疏引鄭云。召公不說。似隘急。故令謀於寬裕。此從序而爲之說爾。釋言云。迷惑也。引詩者。詩抑文。

公曰。前人敷乃心。乃悉命汝。作汝民極。曰。汝明勸。偶王在夏。乘茲大命。惟文王德丕承。無疆之恤。夏丁但反

前人。武王也。敷。布。悉。盡也。命者。顧命也。作。爲。極中也。左傳曰。民受天地之中以生。所謂民極也。作汝民極者。爲汝民則也。詩曰。立我烝民。莫匪爾極。又曰。羣黎百姓。徧爲爾德。此鴻範所以言人民之作極也。曰者。武王顧命之辭也。召公受武王顧命。故周公追述焉。明勸者。明以勉王也。上文所謂勸不及而不以迷也。偶。合也。猶配也。配。古通妃。國語曰。鎮撫國家。爲王妃兮。蓋偶者。仇匹之義。猶詩言公侯好仇也。夏。誠也。誠者。天命之本。所以作民極者也。所謂天棗忱者。棗在斯也。詩曰。不實于棗。後王於以墜命焉。故大學

言君子誠意者。則言無所不用其極也。乘者載而行之也。言前人武王敷布其心。乃盡以顧命汝爲汝民德之極。其盡命者曰。汝明以勉王。所配王者在誠而已。其載行此大命。惟於文王德大承其無窮之憂。此顧命之辭也。蓋亦所謂秉德明恤也。不言大承其休。而言大承其恤者。憂其墜命也。文王之德。以知恤而爲德也。召誥曰。惟王受命。無疆惟休。亦無疆惟恤。其武王顧命之意與。立如字。妃音配。

述曰。敷布。詳盤庚疏。悉盡。詳洛誥疏。引左傳者。成十三年文。引立我者。詩思文。鄭箋讀立爲粒。非也。毛傳不破字。是也。蓋論語所謂己欲立而立人也。毛傳云。極中也。引徧爲者。詩天保文。釋言云。作爲也。釋詁云。偶。妃。合也。則偶亦

妃也。引國語者。晉語文。王妃者。配王也。引好仇者。詩兔置文。詩關雎云。君子好逑。釋文云。逑亦作仇。毛傳云。逑匹也。釋詁云。仇匹也。桓二年左傳云。嘉耦曰妃。怨耦曰仇。蓋耦與偶通。妃與配通。怨耦之仇。則仇之本義也。好仇之仇。則逑之假借也。詩假樂云。率由羣匹。鄭箋云。循用羣臣之匹耦。其例也。蔡傳引蘇氏云。明勉孺子。如耕之有偶也。此釋偶爲耦。而以耕耦言之。非也。耕耦者。相竝也。非以臣配君之比也。夫天子配天。以子配父也。豈相竝哉。則配王可明矣。易坤文言云。地道也。妻道也。臣道也。繇是言之。淑女配君子。則曰好逑。賢才配公侯。則曰好仇。配之而非相竝也。故功臣配享。亦以配稱焉。善乎古經之立言也。昭三十二

年左傳云。物生有陪貳。各有妃耦。王有公。諸侯有卿。皆有貳也。天生季氏。以貳魯侯。此史墨之言耦也。邪說也。不可以亂經也。賁。誠。釋詁文。引不實者。詩板文。序云。板。凡伯刺厲王也。載而行之者。以乘車喻焉。知恤。詳立政篇。惟文王德丕承。無疆之恤。以一句讀也。江氏讀曰。惟文王德丕承。此非其辭氣然也。孟子云。書曰。丕顯哉。文王謨。丕承哉。武王烈。蓋丕承者。丕承其恤也。以陞命爲憂。而承德焉。於是乎有不陞命之烈矣。

公曰。君告汝朕允。保奭。其汝克敬。以予監于殷喪大否。肆念我天威。

否步
鄙反

允。誠也。保。謂大保也。蓋奭之官。禮曰。保也者。慎其身以輔

翼之而歸諸道者也。然則夷之責無可辭矣。言今告汝我誠者。以君夷非他。乃保夷也。顧命曰。大保夷。蓋召公繇是久職焉。否塞也。易之否曰。天地不交而萬物不通也。又曰。小人道長。君子道消也。所謂大否也。肆今也。念天威。願上文而言。蓋言其汝能敬。以予言監視于殷亡之大否塞。今念我天威焉。易之否曰。其亡其亡。繫于苞桑。詩曰。畏天之威。于時保之。此之謂也。真氏曰。言天威曰我天威。蓋天在我而不在外也。大保之大音太長。丁丈反。苞音包。

述曰。釋詁云。允。信也。又云。允。誠也。引禮者。文王世子文。引易者。否彖傳及九五文。程傳云。常虞否之復來曰。其亡矣。其亡矣。其繫于苞桑。謂爲安固之道也。桑之爲物。其根深

固苞謂叢生者其固尤甚。漢王允。唐李德裕。不知此戒。所以致禍敗也。易序卦云。泰者通也。物不可以終通。故受之以否。蓋否爲物之塞焉。引詩者。我將文。詩崧高傳云。肆長也。長猶大也。蔡傳以大念言之。如其說。經不當承上文言永念乎。奚必變文也。

予不允。惟若茲。誰予惟曰。襄我二人。汝有合哉。言曰。在時二人。天休茲至。惟時二人弗戢。其汝克敬德。明我俊民。在讓後人。于不允。允也。其爲文猶多方之言。不忌也。誰告也。襄成也。謂不允。允也。其爲文猶多方之言。不忌也。誰告也。襄成也。謂助成之也。皋陶謨曰。思曰。贊贊襄哉。我者。我王也。故下文言二人者三。皆不曰我二人焉。茲益戢勝也。明者。章明之。

不時。戢與堪同

也。鴻範曰。俊民用章。必於召公先言敬德者。中庸所謂取
人以身也。丕時者大時也。猶今言盛時也。易之泰曰。小往
大來。蓋君子大而小人小焉。俊民旣明。君子道長之時也。
故曰大時。言予不誠而惟若此告乎。蓋告之誠也。予惟曰。
襄成我王者。在子與汝二人。汝聞言其有合哉。亦言曰。在
是二人。今天之休命日益至。惟是二人力寡且不勝。其汝
能敬德。章明我俊德之民。可在讓後人于衆賢太時矣。蓋
言今僅二人。未得賢而讓之。非退老時也。勝平聲長
丁文反
述曰。詩文王云。有周不顯。帝命不時。毛傳云。不顯。顯也。顯
光也。不時。時也。時是也。鄭箋云。周之德不光明乎。光明矣。
天命之不是乎。又是矣。今言不允者。其例也。襄成。詳皋陶

謨疏經於此言我者非我二人也。我王也。蔡傳以我二人爲說。則所襄者何也。故蔡傳云。王業之成。此於經病添文也。僞傳以文武言我二人。此於文未適也。說文云。滋益也。釋詁云。堪勝也。散與堪通。引易者。泰彖文。禮學記云。大時不齊。此以四時爲大時也。蓋與此經釋義不同。

嗚呼。篤棐時二人。我式克至于今日休。我威成文王功于不怠。丕冒。海隅出日。罔不率俾。

篤厚。棐輔也。我者我王也。式用也。威同也。詩曰。克威厥功。不言武王功者。武王繼文王之緒。故以文王統之也。丕冒。皆顧上文所言文武之冒也。海隅出日者。鄭氏謂四海之隅。日出所照是也。蓋以地圓求之。海隅有不見出日者。中

庸曰。日月所照。霜露所隊。凡有血氣者。莫不尊親。其以霜
露言。則不見出日者也。今隨言而略之爾。傳從也。周公告
召公。言當厚于輔王。是在二人。我王既用能至于今日之
美。我王將同成文王之功于不懈。大其覆冒。至于海隅。出
日。無不率從。蓋言必厚輔之。然後不懈也。圖與圖同
隊音陸

述曰。篤棐。詳洛誥疏。式。用。釋言文。蔡傳引吳氏云。周公未
嘗有其功。以其留召公。故言之。此以我爲周公自我也。非
也。自言其功。豈立言之體邪。且以自我言之。則謂我式克
至于今日休。既不歸美於王。亦不分美於二人矣。上文謂
篤棐時二人何也。如以我爲我二人也。則奚不以爲我王
乎。稱我王者。尊君之義也。引詩者。闕宮文。詳上文疏。中庸

云。武王纘大王王季文王之緒。今自文王言之。明克殷之功也。鄭義見魏志注。經言出日。鄭以日出言之。倒文而義明也。蔡傳云。周都西土。去東爲遠。故以日出言。非也。徒舉東隅。經何以言不冒乎。地圓詳堯典璇璣疏。釋詁云。俾從也。詩闕宮云。至于海邦。又云。莫不率從其義也。魏志注引鄭云。俾使也。亦從釋詁也。於文未洽也。大傳云。交趾之南。有越裳國。周公攝政六年。越裳獻白雉。曰。道路悠遠。山川阻深。恐使之不通。故重九譯而朝。成王以歸周公。公曰。德澤不加焉。則君子不享其質。政令不施焉。則君子不臣其人。吾何獲此賜也。其使請曰。吾受命國之黃耆曰。久矣。天之無別風淮雨。意者中國其有聖人乎。盍往朝之。此越裳

之率從也。今未知當此經之先後歟。質古通贄。別風淮雨。殘文之譌也。帝王世紀作烈風淫雨。亦豈必其本文邪。

公曰。君。予不惠若茲多誥。予惟用閔于天。越民。

惠。順也。皋陶謨曰。朕言惠不惠。惠也。猶上文言不允也。閔。傷念也。言我不順而若此多告乎。蓋予之順也。予惟用傷念于天及民爾。此上文所謂永遠念者也。

述曰。詩汝墳釋文云。閔。傷念也。

公曰。嗚呼。君。惟乃知民德。亦罔不能厥初。惟其終。祗若茲。往敬用治。祗音支

民德。上文所謂民極也。蔡氏曰。上文言天及民。而民心者。天命之本也。故專言民德以終之。周公言惟汝知民德。亦

罔不能其初。今日固罔尤違矣。當思其終是也。祇敬也。言祇又言敬者。猶皋陶謨言祇敬也。蓋丁寧之辭。若茲者。卽若茲誥也。往。如易言有攸往之往。謂所行也。用以也。言汝敬若茲誥。汝所往當敬以治民焉。蓋告以治民。明不可退也。蔡氏曰。厥後召公既相成王。又相康王。再世猶未釋其政。有味於周公之言也夫。○林氏曰。無逸君奭皆周公之言。方其爲成王言。則謂商周之治。無不在其君之憂勤。及其爲召公言。則謂商周之治。無不在其臣之輔相。言各有所當也。呂氏曰。後世權位相軋。排之使去。則有之。挽之使留。蓋亦鮮矣。郝氏曰。竊觀周公之志。而知聖人不息之誠。未嘗衰於耄年也。吾當爲之事。不可辭之責。一息不容少。

懈。孟子謂周公思兼三王。坐以待旦。讀君奭始信其然矣。

所當之當去聲
軋音札鮮上聲

述曰。書疏引鄭云。召公是時意說。周公恐其復不說。故依違託言民德以剴切之。此鄭從序而失之也。民德豈託言者乎。且經無召公答辭。安知其意說乎。詩蕩云。靡不有初。鮮克有終。蓋終之則非敬不能也。易復初九馬注云。祇辭也。孫氏以言此經。謂我所告祇如此而已。繇今攷之。非上文若茲多誥之意也。往義詳洛誥疏。蔡傳云。往敬用治。此召公已留。周公飭遣就職之辭。蔡言飭遣者非也。周公自稱曰予小子。敢飭遣召公平。論衡云。召公年百有八十。今以顧命言召公相者推之。殆然也。史記云。馮唐之論將率。

有味哉有味哉。率與帥通。禮祭義云。夫言豈一端而已。夫各有所當也。莊子云。名也者。相軋也。謂傾之也。郝氏者。敬也。明史有傳。洛誥留周公者。周公已留。史錄其答辭。今君夷無之。蓋史略之爾。王氏柏云。周公拳拳求助。故召公竟無佗辭。是矣。然豈無願留之辭邪。